

## ¿NIÁRAA MA JURHIANI NÓTERU MENUSI ÚJPERANHANIA?





Vol. 2, núm. 3 2020 PURÉPECHA

Rebista mámaru jási formatu jimbo: 93,354,000  
Jarhasti 226 idiomecha jimbo

Awake! is published quarterly by Watchtower  
Bible and Tract Society of New York, Inc.  
© 2020 Watch Tower Bible and Tract Society  
of Pennsylvania.

Para MÉXICO KA CENTROAMÉRICA  
Congregación Cristiana  
de los Testigos de Jehová, A.R.  
Apartado Postal 895  
06002 Ciudad de México  
México

Exentaakajtsi lista ma iáimindu  
direksionicha jingoni ixú  
[www.jw.org/tsz/nena-karani-o-uandani](http://www.jw.org/tsz/nena-karani-o-uandani).

# Sóntkuchi úsinga exeni engaksí máteru k'uiripuecha menuši újpijka, joperu sánderu úkua jukasíndi exeni eskachi juchajtu májkueni úsinga.

¿Chájtujtsi menuši újpisinia?

PÁJINA 3

Ju je exeani máru konsejuechani engajtsini  
jarhuataaka iáiminduechani májkueni kaani.

Sési míti je iáimindu ambe

PÁJINA 4

Kurhangukua je máteruechani

PÁJINA 6

Exe je ambe engaksí máteruecha sési újka

PÁJINA 8

Mámaru járhati amiguechani jatsia je

PÁJINA 10

Xarhatatspi je uékperakua

PÁJINA 12

Ístu exe je:

Ambe enga uáka kénditani

PÁJINA 14



¿Uékapirintsí Bibliaeri ambe  
jorhenguahini o eskaksini  
nema p'orhembipiringa?

Exe je [www.jw.org/tsz](http://www.jw.org/tsz)

o karachijsini je ma indeni  
direksionicha jimbo engaksí  
karakua jaka.

Arí publikasioni jindesti para jorhenguahini Bibliaeri ambe, ka ánychikuarhita máesti enga úkuarhejka iáimindu parhakpinirhu, jarhuatakuarhiparini imani tuminani jimbo engaksí k'uiripuecha íntspijka tsípikua jingoni. I publikasioni no ataranhantásindi. Engajtsi uéjka íntspini sáni tumina, exe je [donate.jw.org](http://donate.jw.org). Enga no karakata jauaka máteru ambe, tekstuecha karakata griegaecheri p'itakataksí jarhasti Bibliarhu *Jimbanj* *Eiatsperakua Tata Jesukristueri* ka ístu *Táta Diósiri Uandakua Tata Jesukristueri Aiatsperakua TDU* (tsimarhanksí iási anapu karantskata jimbo). Tekstuecha karakata ebreaecheri p'itakataksí jarhasti ixú *La Biblia. Traducción del Nuevo Mundo TNM*, 2019 utusí jimbo.



# ¿CHÁJTUJTSÍ MENUSI ÚJPISĪNIA?

**Menusi uáni k'uiripuechani ísísti komueska p'amenchakua ma kámani enga no sési útspijka ka enga jamberi k'uiripu no mítejka eska kérikuarhiskia.**

K'uiripuechaksí menusi uásindi imechani engaksí máteru paisirhu anapueka, máteru raseka, máteru idioma uandajka, máteru relijionirika, jimbokaksí tatakeska o nanakeni, jimbokaksí jatsikuarhiriska o nómbé. Ístuksí no májkueni exesíndi k'uiripuechani jimbokaksí sapi-rhatiska o k'ératini, jimbokaksí niraska eskuelarhu o nómbé, oksí diskapasitadueni o ménderueni xarharani. Joperuksí i k'uiripuecha engaksí menusi újpjika nóksí ísí eratsesíndi eskaksí ísí úni jarhasínga.

¿Úpirintsí chájtu menusi újpini jarhanía? Sónkuchi úsínga exeni engaksí k'uiripuecha menusi újpjika, joperuchi úpirínga úkua jukanchani exeni eskachi juchajtu májkueni úsínga. Ambe enga ísíka, jindesti eskachi iá-mínduecha níarasínga sánisí menusi uáni máteruechani. David Williams, enga k'uiripuéri jángua ambe exejka (sociólogo), uandasíndi eska enga k'uiripu ma no sési ambe eratsejka ma grupu k'uiripuecheri ka níá-rani míteni indeni grupuru anapuni ma, “ménderueni kámaati no jamberi kuenta íntskukuarhiparini”.

Por ejemplu, Yovitsa enga sureste de Europa irekaka, jima engaksí namunitu k'uiripuecha irekaka engaksí máteru nanisí anapueka. Ima uandantasíndi: “Ísí exesírenga eska no ma jarhaspka ambakiti k'uiripu indeni grupuru. No exesírenga eskani menusi uáxapka k'uiripuechani jimbokani uandasírenga eska ísíspka ambe engani eratsenga imecheri ambe”.

Uánikua juramutichaksí uaxastaasíndi leichani paraksí iámínduecha májkueni exejperani ka nóksí menusi uáni máteruechani. Peruksí no úsindi kénditani ini ambe. ¿Andi? Jimbokaksí inde juramukuecha solu marhuasínga para ambe engaksí k'uiripuecha *újka* ka no ambe engaksí eratsejka ka p'ikuarhinhini. Joperu nani enga meru uérjika inde jási eratsekua jindesti mintsitarhu ka eratsekuarhu. Jiájkani, ¿méntkisíchi menusi uáua k'uiripuechani? ¿Jarhaski ambe ma enga újka kénditani?

**Máteru pájinecharhu, exenchi jauaka iúmu Bibliaeri karakatechani enga uánikua k'uiripuechani jarhuataakia paraksí nóteru menusi újpínia.**

# SÉSI MÍTI JE IÁMINDU AMBE



## Andisí úkua jukajki

Sáno méntkisí, menusi uásíndiksí k'uiripuechani jimbokaksí imani ambe mítesínga enga no ísika. Por ejemplu:

- Nájkiruka no ísíuaka, máru patronichaksí eratsesíndi eskaksí nanakecha no uáka úni ánkikuarhita ambe engaksí jatsiaka para mákina ambe úraani o komputadora ambe.
- Uánikua k'uiripuechaksí no sési ambe uandasíndi imani k'uiripuecheri ambe engaksí máteru jásí idioma uandajka oksí máteru jásí p'indekuechani jatsiani.
- Uánikua k'uiripuechaksí ísí eratsesíndi eskaksí imecha engaksí no újka exeni, kurhaani o xanharani, kómuksí irekasínga ka nóksí sáni tsípikuarhini.

Uánikua k'uiripuechaksí ini ambe jupindaskuarhísíndi paraksí uandani eska ísíska ambe engaksí

eratsejka, ka seguruksí jarhasti eskaksí imecha engaksí ménderueni eratsejka nóksí ambe ma míteska.

## Bibliaeri karakata

**“No sési jarhasti eska k'uiripu ma no jatsiaka mímíxekua” (PROVERBIOS 19:2).**

**¿Ambe arhikuekasíni?** Engachi no iámindu ambe sési míteaka, imani ambechi uáka enga no sési ja-uaka. Engachi jakajkuska ambe engajtsíni máteruecha aianguaka ka no imani ambe enga meru úkuarhika, ísku jatínchi no sési ambe uandaaka máteruecheri ambe.

## Néna jarhuajpisíni sési míteni ambe ma

Engachi sési míteaska k'uiripuechani, nóchi jakajkuaka chkuanderakua ambe enga uandanhaaka





## ¿Bibliajtsīni jorhendasīni menusi újpini?

Máruksí uandasīndi eska Biblia jorhentpisīnga para menusi újperanhani. Peru, ¿ambemindusí uandajki Biblia?

- **Iáminduechachi májkueni kueraanhaska.** ‘Ma k’uiripu jingontku [Tata Diosí] sírukuani kueraasti, paraksí irekani ma parhakpini’ (Ukuecha 17:26, TDU).
- **Tata Diosí no nema jingoni sánderu k’uetsapesīndi.** Tata “Diosí no nani k’uetsapesín[dij], sino eska jaiapanhentasīnga nakinterku ma nasioni anapu k’uiripuni enga janhanharhijka imani, ka sésí úni” (Ukuecha 10:34, 35).
- **Tata Diosí imani ambe exesīndi na engachi jásiika ka no na engachi xarharajka.** “K’uiripu imani ambejkusí exejti ambe enga imeri éskuecha exejka, peru Jeoba, mintsitanisí exejti” (1 Samuel 16:7).\*

\* Biblia uandasīndi eska Tata Diosí arhinhasīnga Jeoba.

imecheri ambe. Ka engachi mítejkia eska no ísíska ambe engachi aiangunhaka máru k’uiripuecheri ambe, jamberichi nóteru jakajkuakia ambe engachi ístu aiangunhaka máteru k’uiripuecheri ambe.

### Ambe engajtsí uáka úni

- Así májkueni eratsi je iáminduecheri ambe. Na enga jásiika grupuru anapu ma k’uiripu no arhikuekasīndi eskaksí iámindu májkueni jásiiska.
- Jiókuarhi je eskajtsí no iámindu ambe míteska máteruecheri ambe.
- Imani ambe úra je enga mintsinharhikueka parajtsí míteni ambe ma.

AMBE ENGA NITAMAKUARHIPKA K’UIRIPU MA

## Yovitsa / SURESTE DE EUROPA

Yovitsa, engachi antesi uandaka, t’arhexesti imani ambe kurhaaparini engaksí imeri besinuecha, notisiecha ka telebisionirhu uandenga ima k’uiripuecheri engaksí namunituepka. Ima uandantasīndi: “Kánikua menusi uásirenga imani k’uiripuechani, asta kurhunhiasirenga. Ka eratsesirenga eska sési jarhaspka na engani p’ikuarherenga imecha jimbo”.

Ka ístu uandantasīndi: “Joperu engani ejersituru japka, jatsispka parani imecha jingoni jámani engaksí ini mismu grupuru anapuepka. Tiempu jingoni, sánhani arhisppka sési míteani. Asta niárasppka imecheri idioma jorhenguarhini ka kurhaani imecheri kústakua ambe. Sési p’ikuarherasirenga imecha jingoni jarhani ka uénaspka mēnderueni eratseni imecheri ambe. Joperuni úpiringa mēnderu ísí exeani eska antesi. Jimbosíni no exejka notisia ambe enga no sési ambe uandajka inde k’uiripuecheri, nijtuni exeajki pelikulechani ni programechani engaksí teresmarhuajka ini k’uiripuechani. Míteska eska menusi újpini, úsīnga eska ma niáraka ikiakuani ka kurhunhiani k’uiripuechani”.



### Niárasptiksí nóteru kurhunhpinia

¿Ambe jarhuataspi árabeni ma ka judiuni ma paraksí sési pájperania?

**Exe je bideuni ¿Káni andaa ambakiti uépperakua kurhunhperakuani?**

**Exentaakajtsí pájinarhu [jw.org](http://jw.org).**

# KURHANGUKUA JE MÁTERUECHANI

## Andisĩ úkua jukajki

Engachi sánderu imani ambe exeska na engaksĩ máteruecha ménderueni jásiika, jamberi inde ambe uáti eskachi no sési exeauaka máteruechani. Asta-chi úpiringa eratseni eskaksĩ imecha no xáni juka-parhakeska. Engachi niárapiringa ísĩ eratseni, úkua jukapirindi kurhangukuaní máteruechani. Ka i ambe úpirindi xarhatani eskachi uénaxakaia menui uáni máteruechani.

## Bibliaeri karakata

**“Tsípi je imechani jingoni engaksĩ tsípíjka, ka uera je imechani jingoni engaksĩ uerajka”**  
(ROMA 12:15).

¿Ambe arhikuekasĩni? I karakatajtsĩni jorhendasĩndi eskachi jatsiska para kurhangukuaní máteruechani. Ka para ísĩ úni, jatsiskachi para eranhaskani eskachi juchasĩ ísĩ nitamakuarhini jaka ka p'ikuarherani na enga p'ikuarherajka k'uiripu.

## Nénajtsĩni jarhuatasĩni kurhangutspini

Engachi kurhangukuaska máteruechani, exesĩngachi na engachi májkueni jásiika. Kuentachi íntskukuarhisĩnga eskaksĩ májkueni p'ikuarherasĩnga eska jucha ka eskaksĩ májkueni kurhakuarhisĩnga ambe ma jimbo. Engachi kurhangutspinijka, jarhuatasĩndijtsĩni exeni eska nani uéjkichi anapueni, iáminduechachi k'éri familia máeska. Engachi sánderu jánguarhintaska exeni eskachi májkueni járhatiska sánderuchi no jámaaka arhinchpeni.

Kurhangutspini, ístujtsĩni jarhuataati janhanharhiani máteruechani. Anne-Marie, Senegal anapu, p'indespti menui uáni imani k'uiripuechani engaksĩ uánikuecha ísĩ exeauenga eskaksĩ mesusispka. Imajtsĩni aiangusĩndi na enga jarhuatapka kurhangukuaní máteruechani: “Engani exeapka na enga-

ksĩ kómu nitamakuarhienga ima k'uiripuecha, eratsentaspka na engani p'ikuarherapiringa engani ji ísĩ nitamakuarhini japiringa. Ka uénaspka exeni eskani ji no sánderu k'éri ambespka eska imecha ka eskani no ma ambe úspka parani sánderu sési exenhani eska máteruecha”. Ísĩ jimbo, engachi jánguarhintaska exeni na engaksĩ járhati uandanhiatechani jatsiajka k'uiripuecha, sánderuchi kurhangukuauaka ka nóchi jámaaka arhinjaani.

## Ambe engajtsĩ uáka úni


Engajtsĩ no sési exeajka máru k'uiripuechani, jánguarhinta je imani ambe exeni engajtsĩ jimbo májkueni újka ambe ma. Por ejemplu, eranhaska je na engaksĩ p'ikuarherajka inde k'uiripuecha arini ambe jimbo:

- Engaksĩ májku k'éri t'ireni jarhajka familia jingoni.
- Engaksĩ kuataratini k'amarajka ánychikuarhini.
- Engaksĩ imecheri amigu jémbecha jingoni jarhajka.
- Engaksĩ imani pirekua kurhaajka engaksĩ sánderu tsitijka.

**lásĩ, ísĩ exe je eska cha ima k'uiripueska.** Ka kuarhamarhikuarhi je:

- ¿Ambe úpirini engarini nema ísĩ p'ikuastapiringa eskani no ma ambe marhuasĩnga?
- ¿Néna p'ikuarherapirini engaksĩ máteruecha no sési ambe uandapiringa juchiti ambe ka jinijtsĩni no míteni?
- Engani ji imani grupuru japiringa, ¿néna tsitipirini eskajtsĩni kámapiringa?

# Kurhangukuani máteruechani, jarhuatasíndijtsini exeni eskachi iáminduecha májku familia máeska.



## AMBE ENGA NITAMAKUARHIPKA K'UIRIPU MA


### Robert / SINGAPUR

Uandantasíndi: “Antesi ísì eratsesirenga eska imecha engaksì no újka kurhaani, ménderuenksì jásiispka, nóksì xáni jorhenani ka eskaksì sóntku no sési exesirenga ambe ma. Ísì jimbo, jánguarhisirenga no kurhiani. Joperuni, no exesirenga eskani menusi újpisirenga, jimbokani ísì eratsesirenga eska ambe engani uandenga no nemani no sési úkusirenga”.

Seguirisíndi uandantani: “Kurhangukuani na engaksì p'kuarherajka imecha engaksì no újka kurhaani, jarhuatastirini parani nóteru menusi újpinia. Por

ejemplu, ísì exesirenga eska imecha engaksì no újka kurhaani nóksì úsirenga sési eratseni, jimboka engani uandajpauenga, ískujsini pakarasirenga erateni. Peruni eratsentaspka na engani p'kuarherapiringa engani ji no úpiringa kurhangukuani máteruechani. ¡Jíjtuni ískuni pakarapiringa erateani! Asta jíáni engani audifonuechani jukandiatini japiringa, ísì xarhanharhipiringa enajkini no *kurhangukuani* japirini, joperuni jinisíni no úni japiringa *kurhaani*”.

Ka ístu uandasíndi: “Engani na kurhangukuapkia imechani engaksì no újka kurhaani, nóteruni menusi uáspkia”.



# EXE JE AMBE ENGAKSĪ MÁTERUECHA SÉSI ÚJKA

## Andisĭ úkua jukajki

K'éramakuarhini, uáti úni eska ma menušĭ újpiaka. K'uiripu ma engā k'éramakuarhijka, jukarimindu sési eratsesĭndi imeri ambe, sánderu k'éri ambe exekuarhisĭndi ka menušĭ uásĭndi máteru jášĭ k'uiripuechani. Né uéjkini uáti niáranĭ íšĭ eratseni. *Encyclopædia Britannica* uandasĭndi: “Sáno iápu-risĭ anapu k'uiripuechaksĭ eratsendi nájkiruka sánisĭ

o kánikua, eska sánderu ambakitiska, na engaksĭ irekaka, imecheri t'írekua, na engaksĭ xukuparhajka, p'índekuecha, ambe engaksĭ jakajkujka ka néna engaksĭ újka ambe ma”. ¿Ambechi uá úni parachi no íšĭ eratseni?

## Bibliaeri karakata

“Sánderu k'éri ambe exeani máteruechani, ka eska chájkumindu” (FILIPUSA 2:3).

¿Ambe arhikuekasĭni? Parachi no jámani k'éramakuarhini, jatsiskachi para kaxumbitini. Engachi kaxumbitiska niáraakachi exeni eskaksĭ máteruecha sánderu sési ambe úšĭnga eska jucha. No nani anapuechaksĭ sánderu k'éri ambesti.

Ju je exeni ambe engā úkuarhinchapka Stefan, ima nóteru menušĭ exeasptia imani k'uiripuechani engaksĭ máteru paisirhu anapuepka, uandasĭndi: “Pé-riŋga para úni iáminduechani májkueni exeani, ué-



# Jiókuarhi je eskaksĩ máteruecha úsĩnga úni ambe ma engajtsĩ cha no újka úni.

tarhisĩnga eratseni eskaksĩ máteruecha sánderu k'éri ambeska eska jucha. Ji no iámindu ambe míteska ka méntkisĩ uáka jorhengarhini máteruecheri ambe”.

## Ambe engajtsĩ uáka úni

Jánguarhi je exeni eskajtsĩ no iámindu ambe uáka úni, ka eskaksĩni ménisĩ no sési uérachiaka ambe ma. Jiókuarhi je eskaksĩ máteruecha úsĩnga úni ambe ma engajtsĩ cha no újka úni. Ka asĩ jáma je uandani eskaksĩ iáminduecha ma grupuru anapu k'uiripuecha májkueni jásiiska.

Enbesi de no sési eratseni grupuru anapu k'uiripueri ma, kurhamarhikuarhi je:

- ¿Meru no sési jarhaski ambe engani no tsitijka inde k'uiripueri o solu ménderueni úxaki ambe ma?
- ¿Úpirini inde k'uiripu exeni ambe ma engani ji no sési újka?
- ¿Ambe sánderu sési úsini inde k'uiripu ka eska ji?

Engajtsĩ jurhimbikua jingoni mókuantaska ini kurhamarhikuechani, nóterujtsĩ menuši újpiakia ka niáarakajtsĩ tsitini ambakiti ambe engi inde k'uiripu újka.

## AMBE ENGA NITAMAKUARHIPKA K'UIRIPU MA

### Nelson / ESTADOS UNIDOS

Uandantasĩndi: “Engani sapichkuepka, jima irekaspka engaksĩ sáno iáminduecha májku jási rasepka ka májku járhati p'indekuechanksĩ jatsiani. Peru engani 19 jatiripkia, k'éri iretarhu ma mótsispka parani frabrikarhu ma áchikuarhini. Jima uápurisĩ anapuecha jingoni kúnguarhisppka engaksĩ mámaru jási rasepka ka mámaru járhati p'indekuechanksĩ jatsiani”.

Seguirisĩndi uandantani: “Engani sánderu míteuenga ka imecheri amigu úkuarhini, sánderuni exesĩrenga eska kolori, idioma o nani engi anapueuaka, no xarhataĩnga na engi meru eratsejka k'uiripu ma ka sini áchikuarhiriski o mintsinharhikueni”.

Ka istu uandasĩndi: “Máteru paisiru anapu ma jingoni tembuchaska ka engi máteru raseka, ka iásĩ tsitisĩnguia ts'émuni máteru jási t'irekua ka kurhaani máteru jási kústakua engani no méni kurhaani japka. Niáraska míteni eskachi iáminduecha úsĩnga sési ambe ka no sési ambe úni. Péringani iásĩ sánderu ambakiti k'uiripu máekia, desde engani uénaka tsitini ka úni imani ambakiti ambe engaksĩ máteru k'uiripuecha újka, engaksĩ máteru jási raseka ka máteru jási p'indekuechanksĩ jatsiani”.

# MÁMARU JÁRHATI AMIGUECHANI JATSIA JE

## Andisí úkua jukajki

Engachi no kúrhiaska imani k'uiripuechani engachi no sési exeajka, úpiringachi sánderu menusi újpini. Ka engachi imantku kúrhiaska engaksí ísika eska jucha úpiringachi uandani eskachi juchajkusí sési eratsejka, p'ikuarherani ka jámani.

## Bibliaeri karakata

Míta je “chári mintsitani” (2 KORINTU 6:13, TDU).

¿Ambe arhikuekasíni? Uandakua *mitsita* ístu arhikuekasíndi ambe engachi p'ikuarhenhijka. Engajtsíni imechajku sési p'ikuastajka engaksí ísika eska jucha, ísipirindi enajkichi míkani japirini ju-

chari mintsitani. Parachi no ísí úkuarhinchani, jatsiskachi para jiókuarhiani máteru járhati k'uiripuechani paraksí juchari amigueni.

## Néna jarhuajpisíni mámaru járhati amiguechani jatsiani

Engachi sési mitejka nemani, niárasíngachi exeni andisí ménderueni újki ambe ma. Ka engachi kún-guarhiska imani jingoni, uénasíngachi exeni eska májkueni jásíiska eska jucha. Niárasíngachi sánderu jukaparharani, ka enga ima sési p'ikuarherani jarhajka o komu p'ikuarherani jarhajka juchajtuchi májkueni p'ikuarherasínga.

Ju je exeni Nazaréri ejemplu, enga jatsipka para nóteru menusi uánia imechani engaksí máteru nanisí uératini jurhenga. Imajtsíni aiangusíndi: “Imecha jingoni jarhasírenga ka imecha jingoni áchikuarhisírenga. Niáraspka míteani k'uiripuechani engaksí méntku ménderueni jásíipka eskani na aiangunhapka. Engari amiguechani jatsiajka engaksí máteru nanisí anapuejka jorhenguarhisíngari nóteru arhinchaani ka niárasíngari xénchaani ka jukaparharaani”.



## Ambe engajtsi uáka úni

Jánguarhinta je uandontskuarheni imecha jin-goni engaksi máteru paisirhu anapueka, máteru raseka o engaksi máteru idioma uandajka. ¿An-dijtsisi no arini ambe újki?

- Arhia je eskaksini aianguaka imecheri ambe.
- P'imarhia je t'ireni.
- Kurhajchaa je engaksini aianguaka ambe engaksi nitamakuarhika ka jánguarhi je exeni ambe enga sánderu jukaparhakueka para imecha.

Engajtsi jánguarhintaska kurhangukuani ambe engaksi nitamakuarhika, sánderujtsi kurhangu-kauauka ka sánderujtsi sési ambe eratseakia ima k'uiripuecheri ambe.



## ¡Jingontku jáma je!

Máru k'uiripuechaksi no sési járhati p'inde-kuechani jatsiasti ka imani ambeksi úsindi enga no sési jaka para imecha ka ístu para má-teruecha. Ís'i jimbo, jatsiskachi para sési erakuani juchari amiguchani. Engachi no kú-rhiaska imechani engaksi no jurhimbitku jámajka o engaksi ísku jándikua ambe niátajka, inde ambe no arhikuekasindi eskachi menusi újpisinga. Nájkirukachi no no sési káuaka imani k'uiripuechani engaksi no májkueni járhati p'in-dekuechani jatsiaka eska jucha, níjtuchi arhiani eskaksi no ís'i uáka, ambe enga sánderu sési jaka jindesti eskachi no kúrhiauaka (Prover-bios 13:20).

AMBE ENGA NITAMAKUARHIPKA K'UIRIPU MA

## Sookammah ka Kandasamy / CANADA

Uandantasindiksi: "K'uiripeskachi Sudáfrica enga *apartheid* japka. K'uiripu jatsispti para uápurisi irekani seguni na enga jási rasepka. Inde ambe úspti eskaksi k'uiripue-cha uénapinga menusi újperani. Nóchi urapiska ka nóchi sáni xénchaasirenga imechani engaksi urapipka, jimbokajtsini máru ís'i kámaspka enajkichi no jukaparha-pi. Jiájkaniisichi no eratsesirenga eskachi menusi újpisirenga. Sánderu sési, ísichi exesirenga enajkichi ju-chasi no sési kánhani japi".

Seguirisindiksi uandantani: "Parachi nóteru ís'i eratse-nia, uénaspkachi uápurisi anapu amiguchani jatsiani. Engani uénapka imani k'uiripuechani kúrhiani engaksi urapipka, niáraspkachi exeni eskaksi nójtu xáni ménde-rueni jásiispka. Láminduechachi májkueni járhati uandanhiatechani jatsiasinga ka májku jási ambechi ni-tamakuarhisinga".

Ka ístuksi uandasindi: "Astachi niáraspka p'imarhini te-mungurhirini ma engaksi urapika paraksi ma tiempu juchantsini jingoni irekani. Sésichi niáraspka míteani, ka nóchi ióndaspka amigu úkuarhini. Indeni ambe jimbo, uénaspkachi sánderu sési ambe eratsenia ima k'uiripue-cheri engaksi urapika".



## Niárastiksi meru erachini

Nájkiruka Johny ka Gideon máteru jási rasepka ka ménderuenksi eratseni politikeri ambe, niárastiksi ambakiti amigu úkuarhini.

**Exe je bideuni Johny ka Gideon: orhetkuksi enemiguespti, iásiksi ermanuestia. Exentaakajtsi pájinarhu jw.org.**



# XARHATATSPI JE UÉKPERAKUA

## Andisí úkua jukajki

No uátí ma jurhiatikua jimbojku nóteru menusi új-peranhania. Tiempu uétarhisíndi ka eska ma káníkua jánguarhintaaka para kénditani p'amenchakua ma, sáno májkueni ambe uétarhisíndi parachi nóteru menusi újpinia. ¿Ambechi uá úni parachi nóteru menusi újpinia?

## Bibliaeri karakata

**Uékpera je, “jimboka uékperakua jindeska enga újka para májku uántani íaminduechani”**  
(KOLOSASI 3:14).

¿Ambe arhikuekasíni? Ambakiti ambe úni máteruecha jimbo, úsindi eska k'uiripu májku k'éri ja-uaka. Engajtsí xarhatakuaska máteruechani eskajtsí xénchaasínga, sánderujtsí no menusi újpiaka ka nóterujtsí kurhunhpeakia.

## Ambe engajtsí uáka úni

Eratsi je nénajtsí uá uékperakua xarhatakuani imani k'uiripuechani engaksí imani grupuru jaka engajtsí cha no tsitijka. No uétarhisíndi eskachi k'éri ambe uáka. Uákajtsí arini ambe úni:

- Sési kámpi je, por ejemplu mítatspi je puertani o jurajku je eska máteru k'uiripu uaxakaaka jima engajtsí cha uaxakatini jaka autobusirhu o kombirhu.
- Uandontskuarhi je ambe máeri imecha jingoni, nájki-rukaksí no xáni sési uandaaka chári idioma.
- Tekaantskua xarhata je engaksí imani ambe úska engajtsí cha no kurhanguaka.
- Jingontku kurhajchaa je ka jánguarhinta je kurhangukuanimecheri uandanhiatechani.





## Engachi sánhani arhiska uékperakua xarhatakuani máteruechani, méntkuchi nóteru menusi újpiakia.

AMBE ENGA NITAMAKUARHIPKA K'UIRIPU MA

### Nazaré / GUINEA-BISSAU

Uandantasíndi: “Ílontki, menusi uásírenga imani k'uiripuechani engaksí máteru nani uératini jurhenga. Arhisptijtsíni eskaksí uánikua inde k'uiripuecha chkuanderakuasírenga juramutichani nomasi paraksí jarhuatanhani óksí niárasírendi no sési úri úkuarhini. Jimbosíni úkua jukanchenga xénchaani. Peruni ji no ísí exesírenga eskani menusi újpisírenga, jimbokaksí sáno iámindu k'uiripuecha májkueni eratsesírenga imecheri ambe”.

Ka ístu uandantasíndi: “Tátsekua, kuenta íntsku-kuarhisпка eska indení ambe jingoní enganí eratsenga, menusi uáni jarhasírenga imechani engaksí máteru nani uératini jurhenga. Ambe enganí jorhenguarhini japka Bibliarhu, jarhuatastírini sánderu sési kaani ini k'uiripuechani. Nóteruní ísí exeasínguia, sánderu sési, uandajpaasínguia, uandontskuarhekuaní ka jánguarrhintasínguia sánderu sési míteani. Íásí, nóteruní ísí exeasínguia eska íóntki ka sési p'ikuarherasínguia imecha jingoní jarhani”.



### “Uékasírenga eska iámu ambe jurhimbikua jingoní úkuarhipiringa”

Rafika grupu ma jingoní úkuarhispti engá uékenga eskaksí iámindu rasecha jurhimbikua jingoní kánhapiringa. Joperu engá níпка Jeobaeri testiguecheri k'éri tánguarrhikua ma jimbo, niáraspti exeni eskaksí iáminduecha májku k'éri jarhasпка ka Rafika ini ambesí jirinhaní japti.

Exe je bideuni *Rafika Morris: Uékasírenga eska iámu ambe jurhimbikua jingoní úkuarhipiringa*. Exentaakajtsí pájinarhu [jw.org](http://jw.org).

# AMBE ENGA UÁKA KÉNDITANI

Uánikua k'uiripuechaksí ísí úxatia eskaksí na uandajka Bibliaeri karakatecha engachi exeakia ka niárastiksia nóteru menusi újpini. Joperu ambe engá ísika, jindesti eskachi jandiajku no uáka méntku nóteru menusi újpinia. Jiájkani, ¿am-bejtsíni jarhuataa kénditani?

## Ambakiti juramukua ma

Ambe engá xáni úkuarhikia iónisi, xarhatasíndi eskaksí juramuticha no úxaka úni eskaksí k'uiripuecha nóteru menusi újperaakia. ¿Arhikuekasíni i ambe eska no ma juramukua uáka ísí úni?

Paraka nóteru méni menusi újperanhaakia, juramukua ma arini ambe jatsisti para úni:

1. Jarhuatani k'uiripuni paraka uékaaka mójtakuni ambe engá eratsejka ka p'ikuarherani máteruecha jimbo.
2. Nóteru imani ambe p'ikuarherania engá újka eska ma no sési kaauaka máteruechani.
3. Juramutichani jatsiani engaksí no menusi újpiaka.
4. Úni eskaksí interu parhakupini anapuecha májku k'éri jauaka.

Biblia uandasíndi eska Tata Diosí uaxastaskia juramukua ma engá iámindu ini ambe uáka. Jindesti Tata “Diosíri Juramukua” (Lukas 4:43).

Exe je ambe engá uáka i juramukua juchantsíni jimbo.

## 1 | Eska jauaka sánderu ambakiti jorhentperakua

Iámindu parhakupini anapuechaksí jorhenguarhiati jurhimbiku úni ambe ma (ISAÍAS 26:9).

“Jurhimbikua jingoni úni ambe ma pí-nandikua jarhasíndi, ka ambe engá jarhajka jurhimbikua jimbo sési p'ikuarherakua ka seguridada para méntkisi” (ISAÍAS 32:17).

¿Ambe arhikuekasíni? Tata Diosíri Juramukua, jorhendauati k'uiripuechani ambe engá meru ambakiti ambeka. Engachi niárajka exeni ambe engá sési jaka, ambe engá no sési jaka, ambe engá jurhimbikueka ka ambe engá no jurhimbikueka, niárasíngachi ménderueni exeani k'uiripuechani. Iáminduechaksí niáraati míteni eska ambe engá sési jaka, jindeska uékaani iámindu jási k'uiripuechani.

## 2 | Eskachi sési p'ikuastanhantaaka

Tata Diosí, “kutsunharhikuauati iá-mindu uekua ka nóteru jauatia uarhikua ka ni uandanhiata ka nóteru nema ueraati ka ni p'amenchani jim-boka nitamaakia iámindu uénani anapu ambe” (JAŊASKUECHA 21:4).

¿Ambe arhikuekasíni? Eska Tata Diosíri Juramukua k'amajkuaka iámu kómu nitamakua ambe engá niárajka jarhani jimboka k'uiripu no jurhimbikua jingoni jámasínga. Imecha engaksí niáraka no sési kánhani, nóteruksí kurhunhpiatia.

### 3 | Eskachi ambakiti juramutini ma jatsiaka

“No jusgarpeati seguni eska na jáxea-ka ma k’uiripu ni seguni eska na kurhajchpiaka. Jurhimbikua jingoni jusgariauati pobrichani, ka jurhimbikua jingoni jurhimberpintaati para echerirhu anapu kaxumbitichani marhuakuani” (ISAÍAS 11:3, 4).

¿Ambe arhikuekasini? Eska tata Jesukristu enga Juramutika Tata Diosiri Juramukuarhu, jurhimbikua jingoni juramuaka parhakupinirhu auandarhu uératini ka no nemani sánderu sési kámaati. Jesusi no sánderu xénchasindi ma nasionini o lugarini ma eska máteruni ka uáti eska íámu parhakupinirhu kurhajchanhaaka imeri juramukuecha engaksí jurhimbitkueka.

### 4 | Eskachi májku k’éri jauaka

Tata Diosiri Juramukua úsindi eska k’uiripu “májkuentstini jauaka para[ksi] májku ambe eratseni ka ístu májku ambe p’ikuarherani” (1 KORINTU 1:10).

¿Ambe arhikuekasini? K’uiripuecha engaksí Tata Diosiri Juramukuarhu jauaka, meruksí májku k’éri jauati. Májku k’eriksí jauati jimbokaksí sési jimbo uékperaaka.

### ¿Uáchi jakajkuni eska jauaka i jási juramukua ma?

Jo, peru orhetajtsí jatsiska para arini ambe úni:

- Arhi je Jeobaeri testiguni ma eskaksini exe-raaka nani enga Biblia uandajka eska nóteru ióndani Tata Diosiri Juramukua ísí uáka eska na aiatspeni jaka.
- Exe je bideuni ¿Ambeski Tata Diosiri Reinu? Exentaakajtsí pájinarhu [jw.org](http://jw.org).
- Ni je Jeobaeri testiguecheri tángua-rhikua ma jimbo ka chájkumindu exe je eskaksí sési jimbo uékperasinga ka eskaksí májku k’éri jarhaska.



# Niárástiksĩ nóteru kurhunhpinia



Exea je ini eksperiensiechani ka máteruechani pájinarhu [jw.org](http://jw.org).



## “Uékasĩrenga eska iámu ambe jurhimbikua jingoni úkuarhipiringa”

Rafika grupu ma jingoni úkuarhispti enga uékenga eskaksĩ iámindu rasecha jurhimbikua jingoni kánhapiringa. Joperu enga nípká Jeobaeri testiguecheri k’éri tánguarhikua ma jimbo, niáraspti exeni eskaksĩ iáminduecha májku k’éri jarhaspka ka Rafika ini ambesĩ jirinhani japti.

**Exe je bideuni Rafika Morris: Uékasĩrenga eska iámu ambe jurhimbikua jingoni úkuarhipiringa. Exentaakajtsĩ pájinarhu [jw.org](http://jw.org).**



## Niárástiksĩ meru erachini

Nájkiruka Johny ka Gideon máteru jási rasepka ka ménderuenksĩ eratseni politikeri ambe, niárástiksĩ ambakiti amigu úkuarhini.

**Exe je bideuni Johny ka Gideon: orhetkuksĩ enemíguespti, iásíksĩ ermanuestia. Exentaakajtsĩ pájinarhu [jw.org](http://jw.org).**



## Niárástiksĩ nóteru kurhunhpinia

¿Ambe jarhuataspi árabeni ma ka judiuni ma paraksĩ sési pájperania?

**Exe je bideuni ¿Káni andaa ambakiti uékperakua kurhunhperakuani? Exentaakajtsĩ pájinarhu [jw.org](http://jw.org).**



Késku je gratisi  
ini rebistani ka  
engaksĩ antesi  
uéraka



Arhinta je Bibliani  
Internetirhu;  
jarhasti jukari 200  
idiomecha jimbo

Exe je [jw.org](http://jw.org)® o  
eskaniari je ini  
kódiguni



920.3-TFS  
200811